

Es 't loeitj in Pej.....



**Es 't loeitj in Pej,
Den kóns se gerösj stèlle,
Det die klanke,
Ós get wille vertèlle.**

**Ze höbbe 'n boadsjap,
Väör erm en väör riek.
Väör jónk en awd,
Väör ederein geliek.**

**Es 't loeitj in Pej,
Saoves óm zès oer.
Zuus se sjufelendje minse,
Langs de kirkemoer.**

**Ze baeje väör kranke,
En väör luuj zónger werk.
En ouch väör die minse,
Die neet gaon nao de kerk.**

**Es 't loeitj in Pej,
Is 't wit/gael verseerdj, neet verkieërdj.
Den weurtj Oze Leve Hieër,
Mit ein processie ge-ieërdj.**

**Ónger d'n hemel,
In ein gouje mónstrans.
En geluivige baeje helop,
De ganse roazekrans.**

Es 't loeitj in Pej,
En hange de vlagge in top,
Den loupe de kommunikantjes,
Mit de fanfaar väörop.

Mèsdeners mit wierook,
De sjötterie en anger luuj.
Kènjer mit straolende uigskes,
Gans in 't nuuj.

Es 't loeitj in Pej,
Smörgesvreug, al väöle jaore,
Viere ze inne kirk,
Det Jezus is gebaore.

'n Vol kirk,
't Kènjerkoar, mit heldere zank,
'n Wónjersjoan mès,
Mer doertj waal èns zoa lank.

Es 't loeitj in pej,
De klank maaktj väöl oet,
Den trouwtj 'n stèl inne kirk,
'ne Broedegóm en 'n broed.

Den loeie ze oetbundig,
En make väöl laeve.
Want 'n paar haet zoa jus,
Häör jao-waord gegaeve.

Es 't loeitj in Pej,
Den zaet uch de klank,
Det d'r verdreet is óm 'n laeve,
En teves es dank.

Bedreufdj zeen de minse,
Nao de kirk gegange.
't Lèste waat ze kóste doon,
Dao klinke prachtige gezange.

Es 't loeitj in Pej,
Sóndigsmörges, let wel!!
Zeen d'r minse die knotere.
En die zeen den hieël fel.

**Zie waere gestuurdj,
In hunne slaop, mien leef luuj.
En rake den op slaag,
In ein kwaoj buuj.**

**Mer wore d'r gein klokke in oos dörp,
In 't landj van Pepijn,
Den hawwe w'r in Pej,
Gein hert en zieël, gaar gein!**

**Zeentj blie mit de klanke,
Ich gaef uch deze raod,
Es 't loeitj in Pej,
Aan de kirkstraot.**

**Jaqueline v.d. Heuvel- v.d. Munckhof Vènraoy.
Echs: Pitje vanne Meister.**

